

1 Tesalonike

Pauloŋe Tesalonike yeŋgât akmâ Anutu mepaimŋe miep.

1 ¹Nâ Paulo akto galalogâtne Sila akto Timoteo nenŋe Tesalonike kepian gâtŋe Anutu Ewenenŋe akto Humonenŋe Yesu Kristo yâkgât kâmotyetŋe ye oloŋyegiat aregât kulem esenŋe ire kulemgoen. Yeŋgât hin nâŋgân. Anutuŋe yeŋgât okot âlep akyeŋgimbo biwiyenŋe sândugeâkgât nâŋgân.

²O galalupne, ye hârokgât hokboâk hokboâk Anutu mepaimŋe mem ulilanmaen. ³Amâ hingât. Ye biwiyenŋe Yesugâlân katmâ okot âlep aganmai aregât agak meme âlepŋe mem âgâmai. Akto Humonenŋe Yesu Kristo are lâmgom han biwi golâk manmai aregât âiâk âlepŋe memâk manbiâ biwiyenŋe bo hioŋmap. Aregât Anutu Ewenenŋe mepaimŋe memaen.

⁴Galama nen hin nâŋgâmaen. Anutuŋe han kalem akyeŋgim mem kepiâyegep. ⁵Hain akyeŋgiepgât pat âlep den mem arim makyenŋienŋe den yânŋe bo agep. Are kârikŋe olop akto Heakŋe olop akto okot owâiŋe olop agep. Akto yeŋgâlân malionân yeŋgât akmâ siâ me siâ akmâ meyion are nâŋgâi. ⁶Aregât agak memenenŋe meyi. Dâ areâk bo. Sop ain luâk siânŋe bâleŋe akyeŋgimbiâ are hanâk dâm Anutugât den membiâ umatŋe kakyenân dondâ âgâmbô Anutugât Heakŋe tân yeŋgumbo okot âlep humo nâŋgâyi, aregât Humonenŋaet agak meme akto nengât agak meme meyi. ⁷Ye hain akmâ hâk hilâlâm dondâ nâŋgâyi aregât benŋe hanâk dâm heronŋe agi. Aregât Yesugât kâmolân gâtŋe Makedonia hânân akto Akaia hânân manmai arekŋe yeŋgât pat nâŋgâm agak meme yeŋe hainâk meyi. ⁸Akto Makedonia akto Akaia areâk bo. Biwiyenŋe Anutugâlân katmâ manmâ âgâyi aregât pat sambelem arimbo kepia bikŋe bikŋe hârok nâŋgâyi, aregât yeŋgât dengât âi lâuwânŋe bo memberen. ⁹Akto nen pup pup yeŋgâlân togoyion amâ den pat âlepŋe nâŋgâm heronŋe akmâ okot âlep aknengim maŋgan nenekmâ lâpio hepun yekmâ Anutu konok manman âlepŋe akto den bunŋe damunŋe are hoŋ bawa aganŋi a hârok makmâ miawakbiâ sambelem arimap. ¹⁰Dâ areâk bo. Anutuŋe nanŋe momoŋânba oloŋdo agalep yâkŋe kuk bâleŋe miawakbiap aregât nengât

moep aregât nen Yesugât kâmolân gâtne kugân bo kinbaen. Aregât yeŋe himbimânba purik katbiapgât lâmgom manmai.

Paulomaŋe Tesalonike yeŋgât akmâ âi meyi.

2 ¹Galalupne, nen yeŋgâlân togom makyenŋienne bunne miawak yeŋgiep are emelâk nânġâyi. ²Akto ulik gulik Pilipi kepia ain ariyion ain umatne metne aknengiyi pat are emelâk nânġâyi. Ainba Anutugât den pat âlepne are ye makyenŋiwerâm togoenŋe sop ainâk Tesalonike gâtne biknande kuk bâleŋe humo aknengimbiâ hanâk dâm den pat âlepne makyenŋiyion aregât pat ye emelâk nânġâyi. ³⁻⁴Akto aregât lâuwânne makbe. Anutuŋe nengât nânġât den pat âlepne arim makyenŋiwai dâm huŋgun nengiep aregât luâkne nenekbiâ huraguâk bo dâm âmâ Anutuŋe kambiam nenŋe ekmap yâkne nenekto huraguâk dâm aregât den pat bunne makmâ agak meme âlepneâk mem manmâ lau tu den bo makmaen. ⁵Aregât ye lau tu den bo makyenŋiminiongât pat are nânġâyi. Akto hânġât wan me wan bo egâlianŋminion are nengât Anutuŋe nânġâep. ⁶Akto Kristogât âi luâk kotnenne Aposolo nenŋe âmâ Anutuŋe nânġâmbo huraguâkgât makyenŋimaen. Dâ nen âmâ hain akmâ âmâ luâk biknande akto yeŋe kotnenne mem agatbaigât âi bo mem makyenŋiminion. ⁷Gârâmâ nen âmâ âmbâleŋe nanaŋlupyeŋe yaiwâk damunyeŋe akmai dop hainâk akmâ yaiguâk akyenŋiyion. ⁸Akto okot âlep akyenŋim aregât Anutugât den pat âlepne are makyenŋiyion. Dâ areâk bo. Yeŋgât okot âlep dondâ nânġâm aregât hâk biwinenŋe yeŋgiwaengât nânġâyion. ⁹Akto nenŋaet hâk tângogât âi kârikne mem manmâ hândâk hilâm hârok âi mem, “Tesalonike gâtŋande sot me wan me wan nengimbiâ yeŋgât wan me wan bo akbop.” dâm aregât âinennŋaet puliŋe nenâkâ sot wan puligoyion. Akto sop ainâk âi are hutnân den pat âlepne makyenŋim malion are nânġâi.

¹⁰O Galalupne, nenŋe ye biwiyenŋe Yesugâlân kali yeŋgât wan me wan akyenŋienne ârândânŋe agep are ye akto Anutu nenekbiâ agak meme âlepneâk akto wan siâ bâleŋe bo agep. ¹¹Akto luâk siânŋe nanaŋlupne damunyeŋe akmap dop hainâk nen âmâ yeŋgâlân ikiŋeâk ikiŋeâk ¹²nânġâ nânġâyene mem owâiŋe ketugum biwiyenŋe herone agâk dâm makyenŋiyion. Akto Anutuŋe damunyeŋe akmâ ikiŋaet manman âlepŋân katyekbiapgât yeŋgonmap are luâk yânŋande nânġâyengimbiâ bâliwopgât agak meme âlepneâk mem manmâ âġâwei hain dâm makyenŋiyion.

Tesalonike gâtŋande umatne miawak yeŋgimbo kârikne akmâ kili.

¹³Akto ulikŋân Anutugât den makyenŋienne ainâk den ire amâ den yânŋe hain are bo dâyi amâ Anutugât den bunne dâm meyi den irekne ye biwiyenŋe Yesugâlân kali yeŋgât biwiyenân âi kârikne memap. Aregât Anutu hokboâk

hokboâk mepaimnje memaen. ¹⁴O galama, Yuda luâk Yuda hânân manmâ Anutugât kâmolân gâtje biwiyenje Yesu Kristogâlân kali are yâk yengât kâmolân gâtjande bâleje akyengimbiâ hâk hilâlâm mendâi ye aregât pat nângâm watbiâ yengât kepien gâtjande bâleje akyengimbiâ hâk hilâlâm hainâk nângâm manmâ gayi. ¹⁵⁻¹⁶Akto Yuda luâk biwiyenje Yesugâlân bo kali yâk yengât pat makyengiwe. Yâk yengât hakulupyenje ulikjân Anutugât Propete yengumbiâ moyi. Akto hinje Yesu Humo gai kombiâ moep. Akto areâk bo. Hinje Aposolone Yuda luâk bo manmai are makyengimbiâ biwiyenje Yesugâlân katbiâ hejgemgo yekbop dâm wat nenekmai. Hain akmai aregât luâk âmbâle hârok bâleje akyengimai. Akto Anutuje yekmâ bâin bâleje akto dosayerje humo aktâp dâm kuk bâleje akyengimbo umatjân mandâi.

Pauloje Tesalonike yekberâm ukenje nângâep.

¹⁷Gârâmâ galalupnenje, umatje arekje yengâlânba watnenekto hepunyektenje sop bâlensiâ yu aktâp. Are han biwinenje bo. Hâknennjandeâk bâlâk manmâ mesak gosak agiongât yekbaengât nângâenje humo akto yengâlân togowerâm agion. ¹⁸Aregât togom yekne dâm magion. Dâ nâmâ Paulo nune âmâ sop siân akto siân togowerâm dâre Niambiye dâp tiginjep. ¹⁹Gârâmâ nenje yengât nângâm mâruyeje akmâ kotnenje âgâkgât akmaen aregât hâmbâi Humonenje Yesu Kristo togomboân âmâ enemjân kinmâ âmâ yengât kambiam âlep akbaen. ²⁰Ye amâ nengât egâlianj gogâleanj nenje akto yekâ nângâm âmâ herenje maroje nângâmai.

Pauloje Timoteo huņgunanġo ariep.

3 ¹Galalupne, nen hain manmâ enem dewunyeje ekne dâm malion aregât bâin lâuwâne bo lâmgoweren dâm nâ akto Sila netjeak Atej kepien manmâ Timoteo yengâlân huņgun anjot. ²Akto galanetje Timoteo net olop Kristogât den pat makyengim Anutu hoj bawa aganjmaengât huņgun anġdetje yengâlân togoep. Net Tesalonike kepien gâtje biwiyenje kârikje kilâkgât Timoteo arim den sami makyengimenâ biwiyenje sândugeâk dâm huņgun anġdetje yengâlân togoep. ³Ye dâtje metje kakjân manmâ yeugewâigât Timoteo huņgunanjot. Ye hin nângâi. Nen hârok nengâlân umatje hinare miawaknengimbo ârândânj akmap. ⁴Aregât akmâ nen ulikjân yengâlân manmâ den hin makyengiye. Luâk bikjande bugâje nenguwai, dâyon den are emelâk kârigiep a nângâi. ⁵Aregât, “Ye gain gain mandâi? Biwiyenje Yesugâlân kârikje kindâp me Hâwât Amboje Bâleje yâkje hâwâtyekto den nenje hepunbiâ yân gem bo agep me?” dâre kambiamne indembo bâin ageine umatje iregât hirik dâm indânjân bam bâliwâigât Timoteo huņgun anġdere yengâlai togoep.

Timoteoje purikatmâ Tesalonike yengât pat Paulo maganjep.

⁶Wei galalupne, Timoteoje ye hepun yekmâ purik katmâ hinjeâk netgâlân togo hin maknetkiep, “Yesugât kâmot Tesalonike kepien

manmai arekne okot âlep aknengim biwiyene Yesugâlânâk katbiâ talep. Akto nengât nângâ nengimâk manmai. Akto nenne ye enem dewunyenê ekberâm agion yenê hainâk nen nenekberâm aktâi.” dâm maknetkimbo herone dondâ nângâyiot. ⁷Aregât ire âmâ umatnân manden akto bugâne nengumaiân nen âmâ biwiyene kali hainâk katmâ mandâi den are nângâenne biwinenne kârikne ketugu nenekto kambiamnenne sândugeâp. ⁸Aregât âmâ ye Humogâlân kârikne tatberâi amâ benne nen gai âlepnanâk manberen. Amâ nângâ nângânenne bo gulip akberâp. ⁹Aregât nenne Anutunennaet enemnân kinmâ âmâ yengât dondâ mârumaen. Akto hain akmaigât gain gain Anutu okot âlep humo wanmâ mepaimne mendenne bunne akbiap? ¹⁰Aregât hilâm hândâk âi humo dondâ mem hin ulilannaen, “O Anutu, Tesalonike gâtne yâkne biwiyene kat katgât bâlensiâ yeukne akto âmâ nenne âlepne ârândân ketuguwaen aregât dâp hekat nengimenâ arim tân yenguaen.” dâm ulilannaen. ¹¹Nen hain ulilannaen aregât bikne amâ hin, Anutu Ewenenne akto Yesu Humonenne yâkne dâp hekat nengimbela âlepne dowâk yengâlân togowaen. ¹²Akto nenne okot âlep nângâ yengimaen dop hainâk Humonennde tânyengumbo okot âlep aganmâ akto luâk âmbâle yâne okot âlep akyengiwei. ¹³Aregât miawagâkgât biwiyene mem kârikne ketugu yekbiâp. Hain akmâ benne hâmbâi Humonenne Yesu are akto ikiye kâmolân gâtne ârândân manbai are olop peniangim ye akto nen menenekbiap. Sop ain âmâ Tesalonike gâtne yengât biwiyene Anutu Ewenennaet dewunân katmai are bunne akbiapgât ulilannaen.

Manman nenne ârândânâk yeâkgât damunne akbaen.

4 ¹Galama, den bâine ire makmâ kepikmâ Yesu Humonenne yâkgât akmâ makyengiennê nângâm heנגemgowe. Ulik gulik agak meme Anutunne egâlianmap are mem manbiâ âmâ herone akmap. Aregât keine makyengiennê nângâyi. Nângâm mem manmâ âgâmbiâ unak miawaktâp aregât dondâne mem âgâwei. ²Akto uliknân Humonenne Yesunne wan me wan aknet dâmap yâkne wâtne aknengimbo keine makyengiyion are nângâi me? ³Anutunne agak meme âlepne mem mannet dâm yengonlep aregât luâkdâ âmbendâ bo hepun akmâ ba anğâ hanâk hanâk bo meyekbei. Aregât Anutunne nângâmbo bo huragumap. ⁴⁻⁵Akto kambiamyene egâlian are âlepneâk kilâk dâm luâk âmbâle Anutu bo nângâmai are biwiyene hanâk hanâk egâlian akmâ manmai nen hain akbâen dâm kambiamyene damunne akmâ manbiâ luâk yânnde akto Anutu yâkne yekbiâ huraguwiapgât âmbâle membiâ huraguwiâp. ⁶Akto Humonennde bâlene akmai areyengât umatne kutigitbiap aregât keine makyengiyion. Aregât galalupyene bâlene akyengiwiâigât galalupyennaet âmbâle olop bo manbei. ⁷Aregât keine hin. Anutunne agak meme âlepne mem mannet dâm nengonlep amâ agak meme are helej ketugunet

dâm bo nengolep. ⁸Aregât luâkņe den ire hamiaņmai amâ luâk den bo hamiaņmai amâ Anutu ikinjaet Heak yengimap are hamiaņmai.

⁹Galama, imâ den siâ. Emelâk galalupyenņe hârok kambiam âlep yengimai aregât keiņe Anutuņe makyengimbo nâņgâyi aregât gala okot âlep aganņiņet dâm siâkâ bo makyengiweren. ¹⁰Akto yenņe Yesugât kâmolân gâtņe Makedonia hânân manmai are hârok okot âlep akyengimai. Aregât nenņe ye wan akmai are wârakmâ membiâ miawakmâ yembiapgât hain kulemgoen. ¹¹Akto den siâ hin hâwâtyekmâ makyengiyion. Bam gutmâ ariwai me togowai me kepia siân siân manmâ âmâ den kot kamboņ agak bâlâk bo akbei. Akto bâtyenņande âi mem manbei dâm makyengiyion. ¹²Hain akbiâ âmâ Anutu bo nâņganņmai yâkņe yekbiâ ârândâņ akbiâp. Akto mop miawakyengimbo bikņande tân yengumbiâ bo dâweigât makyengiyion are nâņgâm heņgemgoweï.

Yesu togom mem agatnenekbiapgât den.

¹³Galama, luâk âmâle Anutu bo nâņganņmai yâk âmâ momo kârikņe mombai aregât nâņgâm hamewakmâ biwiyenņe umatņe akto hanyenņe bokto indem tâgâiak akmai. Manmâ indem kambiam bâle akmâ manmai. Dâ ye âmâ hain akbâigât siâkâ makyengienņe nâņgâņet. ¹⁴Nen Yesu mondo hangombiâ sumânba agalep are nâņgâmaen aregât Anutuņe Yesugât kâmot bikņe mombiâ hanyenguyi are momoņânba goanņyeko agatbiâ Yesu olop huņgun yengimbo purik katbai. Aregât okot bâle bo nâņgâyengyiwei. ¹⁵⁻¹⁶Amâ hin. Humonenņe maknengiepgât makyengien. Anutuņe bâin dâm kot kondo aņelo yengât humo konokņe Anutuġât lâmun waito mun humo indembo âmâ sop ain amâ Humonenņe denņe kârikņande ikiņe himbim hepunmâ gewiap. Dâ nen bikņe boâk mombaenân âmâ Humonenņe togowiap ain âmâ luâk âmâle Yesugât kâmolân gâtņe emelâk moyi arekņe soņ agatbai. ¹⁷Hain akbiâ âmâ hamiyenân luâk âmâle golâ bikņe manbaen amâ yâk olop hamandat kâlegen ain mendu agum Humonenņe togombo olowâk himbimân âgâm manbaen. Ain Humo olop dondâņe manmâ âgâwaen. ¹⁸Are âlepņe. Bâin den irekņe galalupyenņe mem biwiyenņe manmâ kârikņe ketugu yekbei.

Yesu pututugâk togowiapgât biwi owâim kinbaen.

5 ¹Galama, Humonenņe togowiap are lâuwâņe makyengienņe nâņgâņet. Humonenņe Yesu togowiapgât sopņe aregât keiņe emelâk nâņgâyi aregât den makyengim kulem esenņe kulemgowaengât âi lâuwâņe bo tatâp. ²Gârâmâ yenņeak yu nâņgâi are Humogât sopņe amâ luâk kâmburâņe hândâkņân boâk nâņgâmbiân togomai dop hainâk ³luâk âmâle hândâk kâlegen manmai are, “Nen âlepņe tatenņe kambiamnenņe sândugem âgâwiap.” dâmbiâ âmâ ainâk Humonenņe purik kato hilip yenņu yengugât dopņe dowâk yâk yengâlân miawakbiap.

Akto âmbâleŋe nanaŋ memberâm hâk hilâlâm akmai dop hainâk umatŋe humo miawak yeŋgimbo hepunakmâ bo ariwai. ⁴Gârâmâ galalupne, ye hândâkŋân bo tatâi aregât luâk kâmburâŋe togomai dop hainâk Yesu purik katbiap sopŋe are yâk bo nâŋgâmbiâ miawak yeŋgimbo otneyeŋe ariwiap. Dâ ye âmâ hain bo akbai. ⁵Ye âmâ hârok pagalenŋan akto dewutân manmai. Akto nen hârok omoŋ me hândâk kâlegen bo manmaen. ⁶⁻⁷Haingât luâk âmbâle yânŋe asiŋ yeye amâ hândâkŋânâk yemai akto luâk âmbâle tu kârikŋe nem amâ hândâkŋân gulip akmai. Nen hain akbâengât kambiam nenŋe damunŋe aktenŋe pâlâmŋe bo akto amâ tu kârikŋe bo nendenŋe amâ nâŋgâ nâŋgânenŋe hulaŋ akbiâp. ⁸Akto nen hilâmŋât luâk âmbâle nâŋgâm heŋgemgoenŋe kambiamnenŋe âlepŋeâk talâk dâm biwinenŋe Humogâlânâk katenŋe kinbiâp. Akto Humo olop âlepŋe maniâm. Akto tembe lokoŋe, “Diŋennân erânekbâi.” dâm diŋenŋaet peke luguakmap nen dop hainâk kambiamnenŋe âlepŋeâk talâk dâm biwinenŋe Humogâlânâk katenŋe kinbiâp akto Humo okot âlep agaŋne. Akto tembe lokoŋe kautne kom hionjboŋgât dâm kautyeŋân irimut kârikŋe kauŋmai nen dop hainâk nâŋgâ nâŋgânenŋe gulip akbop dâm Anutuŋe bunewâk heŋgemgo nenekbiap are miawagâk dâm lâmgomaen. ⁹Akto Anutuŋe nen amâ ikiŋe kâmot dâm oloŋnenekto Yesugât biwinenŋe kalion aregât kuk bo aknengiwiap. Hingât oloŋnenegep. Humonenŋe Yesu Kristo arekŋe heŋgemgonenekbiapgât oloŋnenegep. ¹⁰Akto Humonenŋe Yesu Kristo arekŋe, nen yâk olop mannegât nengât akmâ moep aregât purik katmâ gewiawân mombaen me hânân manbaen nen hârok agatmâ yâk olop golâ manmâ âgâwaen. ¹¹Haingât ye biwiyeŋe kârikŋeâk kinbiâp dâm magaŋgi goaŋgi akmai hainâk ye galalupyenŋe den âlepŋeâk makyenŋimbiâ biwiyeŋe kârikŋeâk kinmâ âgâwiâp.

Damunlupnenŋe yeŋgât amukyenŋân manbaen.

¹²O galama, den siâ ire wârakmâ makyenŋienŋe nâŋgâŋet. Humonenŋe arekŋe damunlupyenŋe katyekto kinmâ hutyeŋân manmâ âi mem Humogât keiŋe makyenŋim biwiyeŋe gulip akbop dâm den kârikŋe makyenŋimai yâk yeŋgât yekbiâ bo gewiâp. Gârâmâ yâk yeŋgât den nâŋgâm amukyenŋân manbei. ¹³Akto damunlupyenŋe âi memai aregât okot âlep akyenŋim lau lokoyenŋim hanâk amukyenŋân manbei. Akto yeŋgât hutyeŋân kuk heŋgân miawakbop dâm gala agaŋgim biwi konok akmâ manbei.

Konam bo akbaen.

¹⁴O Galalupne, yeŋgât den kârikŋe hin ye makyenŋienŋe yeŋgât hutyeŋân luâk âmbâle siâ konam akbiâ makyenŋim kârikŋe ketugu yekŋet. Akto luâk âmbâle wan me wan hârok hamep akmai are tân

yengumbiâ biwiyenje kârikjeâk kinmâ âgâwiâp. Akto luâk âmbâle hâkyenje yeukje aktâp are hainâk tân yengujet. Akto luâk âmbâle hain akmai are titnan titnan yaiwâk akyenjeiwei. ¹⁵Akto luâk âmbâle bâleje akyengimbiâ âmâ hainâk bâleje bo akyengim âmâ âlepjeâk akyenginet. Dâ hin akbei. Sop ârândânâk agak meme âlepje akmâ gala akyenjeiwei. Akto bikje bo potatyekmâ âmâ luâk âmbâle hârok yengâlâk akbei. ¹⁶Akto hokboâk hokboâk mâru humo akbei. ¹⁷Akto hokboâk hokboâk Anutu ulilañbei. ¹⁸Akto Anutuje Yesu Kristogât akmâ nângât kâmot nâ mepaine membei dâm egâlijanmap aregât wan me wan âlepje me umatje miawak yengimbo ainâk Anutu okot âlep aganjmâ mepaimje membei. ¹⁹Akto Anutugât Heakje kâlâp hinare are bo limbâpkowei. ²⁰Akto luâk âmbâle agatmâ Anutuje wan me wan akbiap aregât den makbiâ ye den are bo hâkân akbei. ²¹Akto den are miawakto yeâmâ hârok dowâk bo membei. Dâ hin akbei. Den are nângâm hejgemgom ire âmâ âlepje ire âmâ bâleje hain dâm den potatbei. Hain potatmâ den akto agak meme âlepje pañâk mem manmâ ²²den bâleje akto agak meme bâleje hepunbei.

Den bâije.

²³O Galalupne, nenje yengât Anutu hin ulilañden, Anutuje kambiam nenje mem âlepje ketugumbo sândugemap yâkje meyekmâ ârândân hârok ketugu yekbiâp. Hain akto benje Humonenje Yesu Kristo are purik katmâ lâuwâje togowiawân han biwiyenje âlepjeâk kindo ekto ârândân akbiapgât ulilañden. ²⁴Akto Anutuje oloñ yekmap arekje âmâ ârândânâk hârok akmap aregât wan me wan hain miawak yengijiap.

²⁵O Galama, yeje hainâk nengât Anutu ulilañbei. ²⁶Akto ye hârok gala konok akmâ lokom manjan akbei. ²⁷Nâ Humogât kârikjân kinmâ hin maktân. Ye nâ yu kulengoân ire mem âmâ hainâk Yesugât kâmolân gâtje hârok oyanbiâ nângâwei. ²⁸Akto Humonenje Yesu Kristo arekje damunyeje akmâ okot âlep akyengiâkgât ulilañmaen.